



3. februar 2010

UPA 2010/58

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiupparput:

Royal Greenland ilaannaaluunniit namminersortunut ingerlatassanngortinneqassappat pitsaaqutit pitsaanngequtillu pillugit Inatsisartut ukiamut ataatsimiinnissaannut nassuiaammik Naalakkersuisut saqqummiusseqqullugit peqquneqarnissaannik inatsisartut aalajangiiffigisassaattut siunnersuut.

(Inatsisartunut ilaasortaqaq Ruth Heilmann, Siumut)

Tunggavilersuut:

Royal Greenlandip ilaannaataluunniit namminersortunut ingerlatassanngortissinnaanera naalakkersuinikkut sivitsortumik eqqartorneqartarpoq, tamannali pillugu suli ersarissumik aalajangiiffiunngitsumik. Isumaqarpunga Royal Greenland ilaannaaluunniit namminersortunut ingerlatassanngortinneqassappat pisariaqartoq inuiaqatigiinnut aningaasaqarnikkullu sunniutissat misissorluarneqarnissaat pitsaaqutaasinnaasut ajoqutaasinnaasullu tamaasa qulaajarnerisigut.

Taamaattumik isumaqarpunga Royal Greenland –ip ilaannaataluunniit namminersortunut ingerlatsassanngortissinnaanera pillugu ukiamut inatsisartut ataatsimiinnissaannut Naalakkersuisut nassuiaammik saqqummiinissaat pisariaqartoq Inatsisartut ersarissumik siunnerfeqarnissaat pisinnaaqqulugu.

Suliffeqarfii Namminersorlutik Oqartussanit pigineqartut ullumikkut nunatsinni inuussutissarsiorderup aqqissugaanerani suli salliuallaarnerat arajutsisimaneqanngilaq. Inuiaqatigiit ingerlanneqarneranni innuttaasut toqqaannarnerusumik peqataallutillu akisussaaqataanissaat siunertaralugu, suliffeqarfissuit ilaasa Namminersorlutik Oqartussanit pigineqartut tamakkiisumik ilaannakortumilluunniit namminersortunit pigineqalerlutillu ingerlanneqalersinnaanerat misissoqqissaarneqarluni nalilersorneqartariaqarpoq.

Suliffeqarfissuarnik namminersortunut ingerlatassanngortitsisoqartillugu mianerisassat makku qulakkeerniarneqartariaqarput:

1. Suliffeqarfissuup pisussaaffimmigut innuttaasunut kiffartuussinerata ajorseriannginnissaa.
2. Namminersortunngorsaanerami sapinngisamik sukumiisumik innuttaasut malinnaatinneqarlutillu paasisutissinneqartarnissaat, kiisalu sapinngisamik annerpaamik pigineqataalerlutillu akisussaaqataalersinnaanerat qulakkeerniarneqartassasoq, tamatumani niuernikkut periutsit nalinginnaasut aallaavigalugit.
3. Inuiaqatigiit aningaasarsiornikkut inuussutissarsiorderullu tungaatigut siunissamut isumal-luutaasa namminersortunngorsaaneramik innarlerneqannginnissaat qularnaarneqartassasoq.
4. Sulisunik pikkorissaarnerit, nunaqavissunik sulisoqarnerit, inuiaat kalaallit kultooriannik mianerinninnerit, namminersortunngorsaanerami qimanneqannginnissaat qulakkeerneqarta-riaqartoq.

Inuiaqatigiit ataatsimut soqutigisaat pingaartillugit Kalaallit Nunaat namminersorluni inuussutissarsiuteqarnissamut piumassusilinnut periarfissiisoq, kiisalu Namminersortunngorsaanerami suliffeqarfissuit taamalu Kalaallit Nunaata aningaasarsiornikkut nunanut allanut unammillersinnaassuseqartumik ingerlatsinissaat tunaartarineqartariaqarput.

Taamatut oqaaseqarlunga siunnersuutip Inatsisartunit oqallisigineqarlunissaa kaammattuutigaara.